

Sarajevo, 02.12.2020. godine

Broj: I-245/20

**EKONOMSKO-SOCIJALNO VIJEĆE ZA TERITORIJU FEDERACIJE BIH
(N/R EDHEM BIBER, PREDSJEDNIK)**

PREDMET: Inicijativa za donošenje Poslovnika o izmjenama i dopunama Poslovnika o radu Ekonomsko-socijalnog vijeća za teritoriju Federacije BiH

Poštovani gospodine Biber,

U prilogu ovog dopisa vam dostavljamo inicijativu za donošenje Poslovnika o izmjenama i dopunama Poslovnika o radu Ekonomsko-socijalnog vijeća za teritoriju Federacije BiH.

Molimo vas da se ista stavi na Dnevni red prve naredne sjednice Ekonomsko-socijalnog vijeća za teritoriju FBiH.

Srdačno,



Direktor

Mladen Pandurević
Mladen Pandurević

**POSLOVNIK O IZMJENAMA I DOPUNAMA POSLOVNIKA O RADU EKONOMSKO-SOCIJALNOG
VIJEĆA ZA TERITORIJU FEDERACIJE BOSNE I HERCEGOVINE****Član 1.**

U članu 3. Poslovnika o radu Ekonomsko-socijalnog vijeća za teritoriju Federacije Bosne i Hercegovine dodaju se novi stavovi 5. i 6. koji glase:

Izuzetno, u okolnostima opasnosti po javnu sigurnost i sigurnost građana širih razmjera, epidemija, pandemija, stanja prirodne nesreće, elementarnih nepogoda, i slično, odnosno kada važnost i/ili hitnost, odnosno okolnosti slučaja nalažu, sjednica se može održati online korištenjem informacijskog sistema koji podržava prijenos video konferencije ili aplikacija, programa i drugih elektronskih platformi za direktnu glasovnu i video komunikaciju.

U slučaju održavanja sjednice na način predviđen u stavu 5. ovog člana primjenjuju se odredbe ovog poslovnika, koje osiguravaju potrebne tehničke pretpostavke za rad i odlučivanje.

Obrazloženje

Zbog pojave korona virusa koji predstavlja opasnost po javnu sigurnost i sigurnost građana neophodno je omogućiti održavanje sjednica putem dostupnih elektronskih platformi. Na taj način spriječila bi se mogućnost širenja korona virusa. Održavanje online sjednica ima više prednosti nego nedostataka, što ćemo navesti u nastavku. Pandemija je pokazala da su online sjednice jednako efikasne i da nemaju nikakve negativne efekte. Izmjenama Poslovnika o radu pristupila su mnoga tijela i institucije, kao što su Parlament Federacije BiH, Skupština Kantona Sarajevo, Općinska vijeća, i dr. Tehnologija je toliko uznapredovala da bi se ovakav način održavanja sjednica trebao smatrati sasvim normalnim i koristiti kada god to okolnosti zahtijevaju.

Online sjednice doprinose skraćivanju vremena sjednica, te olakšavaju članovima Ekonomsko-socijalnog vijeća za teritoriju FBiH koji žive u raznim dijelovima FBiH i kojima za dolazak na sjednice treba par sati. U slučaju da se sjednice održavaju online pojedini članovi ne bi morali putovati i vrijeme koji im je potrebno za dolazak i održavanje sjednica od par sati, skratilo bi se na dva, tri sata, koliko traje sjednica.

Shodno navedenom, smatramo da je neophodno izmijeniti član 3. Poslovnika kako je predloženo i uvesti mogućnost online sjednica Ekonomsko-socijalnog vijeća za teritoriju FBiH.

Član 2.

U članu 10. Poslovnika o radu Ekonomsko-socijalnog vijeća za teritoriju Federacije Bosne i Hercegovine dodaje se novi stav 6. koji glasi:

U slučaju nedostatka kvoruma iz stava 1. ovog člana, omogućit će se uključanje predstavnika socijalnih partnera online korištenjem informacijskog sistema koji podržava prijenos video konferencije ili aplikacija, programa i drugih elektronskih platformi za direktnu glasovnu i video komunikaciju, kako bi se obezbijedio potrebni kvorum za rad i odlučivanje.

Obrazloženje

Svjedoci smo da često dolazi do otkazivanja sjednice zbog iznenadne nemogućnosti prisustva predstavnika socijalnih partnera sjednicama zbog čega dođe do nedostatka kvoruma za rad i odlučivanje. Zbog toga je neophodno Poslovníkom propisati mogućnost da se predstavnik socijalnog partnera, čije bi prisustvo ujedno obezbijedilo kvorum, na sjednicu uključi online putem neke od elektronskih platformi. Rad Ekonomsko-socijalnog vijeća na taj način ne bi bio ugrožen, a znatno bi se doprinijelo da se sjednice održavaju redovno i da se ne odgađaju zbog nemogućnosti fizičke prisutnosti nekog od predstavnika socijalnih partnera sjednici.